



Bilten

mjesečni

omladinska mreža bosne i hercegovine

juli
srpanj
2018.

230

Dragi prijatelji/ce,

Predstavljamo vam **julsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **184** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u julu 2018.	2
Planovi za avgust 2018.	5
Aktivnosti članova mreže	6
Saopštenja/informacije/donatori/pozivi	17

Uživajte u čitanju!

AKTIVNOSTI ORC/HCA U JULU 2018.

Profesionalna orijentacija kroz pasoš kompetencija

ORC Tuzla je početkom jula pokrenuo projekat "Profesionalna orijentacija kroz pasoš kompetencija", podržan od strane Ambasade SAD u Sarajevu.

Tim povodom je 12. Jula u prostorijama Omladinskog resursnog centra (ORC) Tuzla, sa početkom u 14.00 časova održana konferencija za medije, u cilju promocije i najave novog projekta za mlade, koji realizuje Omladinski resursni centar Tuzla, u saradnji sa Sarajevskom organizacijom S.K.I.L.L.S.



Ciljevi projekta su:

- *Analizirati obrazovne institucije na Tuzlanskom kantonu i prezentovati analizu, te na taj način informirati mlade u dvije općine (Lukavac i Živinice) o novim školskim/fakultetskim programima koji su usklađeni sa potrebama tržišta rada.*
- *Implementacija treninga i razvoj životnih vještina kroz trening "životne i društvene vještine", za 100 učesnika u dvije srednje škole (Lukavac i Živinice).*
 - *Savjetovanje za pasoš kompetencija (20 adolescenata u ranoj dobi osposobiti za donošenje odluke u saglasnosti sa ličnim sposobnostima, interesovanjima i sklonostima, ali i u skladu sa realnim okolnostima, kao što su zahtjevi tržišta rada, odnosno zahtjevi željenog zanimanja i izgledi na tržištu rada).*

Projekat će se realizirati u narednih 6 mjeseci i pružit će podršku za najmanje 100 mladih ljudi sa šireg područja Tuzle (Lukavac i Živinice) iz završnih razreda osnovnih škola i prvih razreda srednjih škola.

"Objavlivanje ovog teksta je finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država."



Zbog godišnjih odmora, ali i ljetnih raspusta, ORC Tuzla, osim priprema za naredne projektne aktivnosti – u okviru projekata podržanih od strane američke ambasade, i drugih, te slanja izvještaja, nije imao većih aktivnosti tokom mjeseca jula. U avgustu nastavljamo sa redovnim aktivnostima kancelarije.

Omladinska grupa ORC Tuzla

Uči, misli i djeluj (UMiD)

Uči, misli i djeluj (UMiD) je jednogodišnja obuka koju organizuje Institut za razvoj mladih KULT, Sarajevo. U periodu od 15. do 21. jula 2018. godine, održana je Ljetna škola koja se sastojala od šestog, sedmog i osmog modula. Modulima su prisustvovali članovi Omladinske grupe ORC-a **Samira Aličić, Merima Čokić i Mario Mrkić**. UMiD je obuka koja polaznicima nudi mogućnost da steknu samopouzdanje, sagledaju svoje sposobnosti i potencijale, te razviju osjećaj za odgovornost u društvu i steknu vještine timskog rada i liderstva. Obuka je zvanično priznati vid neformalnog obrazovanja, koje mladima pruža mogućnost stjecanja različitih kompetencija koje će ih učiniti konkurentnima na tržištu rada, a program se sastoji od seminara, praktičnih vježbi i volonterskog rada. UMiD je namijenjen mladim ljudima od 15-30 godina. Omogućava da mladi postanu aktivni lideri u svojoj lokalnoj zajednici i pomognu u rješavanju problema mladih, upoznaju nove prijatelje, nauče nove vještine, druže se i usavrše sebe.



Tema šestog modula je: "Komunikacija i mediji", a modul je održan od 15 - 17. 7. 2018. Sažetak modula:

- Osnove komunikacije
- Verbalna komunikacija
- Neverbalna komunikacija
- Komunikacija sa različitim javnostima
- Društvene mreže.

Tema sedmog modula je: "Samoosnaživanje", a trajao je u periodu od 17 - 19. 7. 2018. Sažetak modula:

- Upoznavanje sa svojim prilikama i preprekama
- Jačanje samopouzdanja
- Preuzimanje vlasništva nad svojim postupcima
- Stvaranje pozitivne slike o sebi.

Tema osmog modula je: "Ljudska prava i rodna ravnopravnost", a trajao je od 19 - 21. 7. 2018. Sažetak modula:

- Pojam, vrste i koncept ljudskih prava
- Stereotipi, predrasude i diskriminacija
- Ljudska prava u medijima
- Pojam spola i roda
- Rodna (ne)ravnopravnost
- Pojam rodno zasnovanog nasilja
- Aktivizam u promociji ljudskih prava.

U okviru svake teme, poseban akcenat je stavljen na učesnike kao pokretače u svojoj zajednici, a učili su kako trebaju komunicirati sa mladima iz zajednice i sa medijima, kako da ojačaju svoje osobine za veći uspjeh, te kako trebaju da rade na promociji ljudskih prava i rodne ravnopravnosti. Pored radionica, mladi učesnici su imali priliku prisustvovati na "Kafi sa..." u okviru tema koje su radili.

Tuzlanski ljetni institut (TSI)

BILD IT je program pokrenut 2014. godine a izašao je kao rezultat rada Tuzlanskog ljetnog instituta, koji pruža jednogodišnji trening za sve one koji žele usvojiti sve potrebne vještine da bi postali uspješni Full-Stack programeri. Trenutno je 47 polaznika treninga zaposleno u 16 softverskih kompanija, od kojih su mnoge članice Bit Alijanse.

Bit Alijansa, kao vodeće udruženje softverskih kompanija trenutno broji 44 kompanije članice, koje zapošljavaju preko 60% IT radne snage u BiH, te ima saradnju sa preko 40 institucija i organizacija.



U periodu od 2. do 5. jula 2018. godine održan je jubilarni deseti Tuzla Summer Institute (Tuzlanski ljetni institut). Učesnici su imali priliku da nastave put do zvanja softverskog programera tokom jednogodišnje besplatne obuke. Institut je ove godine okupio preko 200 učesnika, a među njima je bila i članica Omladinske grupe ORC-a Tuzla, **Samira Aličić**. Predavači su bili stručnjaci iz BiH i iz drugih zemalja - Švicarske, Velike Britanije i SAD-a.

Kamp mladih Crvenog krsta Živinice – „Drenik 2018“



Crveni križ Živinice svake godine organizuje Kamp Mladih na lokalitetu PD Drenik, u cilju okupljanja mladih volontera iz cijele BiH, pa i regije. Ove godine je kamp trajao od 20. do 23. jula, a tematika kampa je bila međjuvršnjačko nasilje i deseminacija o Crvenog Križu. Edukatori su bili volonteri CK Živinice i CKTK.

Član OG ORC-a **Deni Trumić** je prisustvovao kampu u svojstvu organizacijskog tima Crvenog Križa Živinice za Kamp "Drenik 2018".

ONAuBiH sedmica

“ONAuBiH sedmica” je naziv aktivnosti koje je organizovala Omladinska novinska asocijacija u Bosni i Hercegovini u periodu od 2. do 6. jula 2018. godine. Cilj ove sedmice je da se promoviše rad ONAuBiH-a kroz različite aktivnosti u lokalnim zajednicama, poput gostovanja u lokalnim medijima, razgovora sa lokalnim nevladinim organizacijama, flashmobovima i drugim aktivnostima. Učešće u aktivnostima su uzele ekipe iz 13 različitih gradova (Živinice, Goražde, Sarajevo, Mostar, Trebinje, Banja Luka, Brčko, Travnik, Doboj, Bihać, Breza, Zenica i Gradačac), a čine ih članovi asocijacije.

Omladinska novinska asocijacija u BiH je nevladina organizacija stvorena s ciljem da mladima omogući kvalitetno obrazovanje na svim poljima novinarskog posla kroz različite seminare, radionice, treninge. Slovi kao multinacionalna i multietnička organizacija, osposobljena pružiti mladima priliku da se pobliže upoznaju sa medijima i učestvuju u kreiranju vlastitog medijskog prostora. Vizija ONAuBiH-a je društvo gdje je javnost medijski osviještena, gdje su mediji slobodni, a izvještavanje korektno, tačno i u interesu javnosti.



Članovi Omladinske grupe Omladinskog resursnog centra u Tuzli, **Samira Aličić i Deni Trumić**, su sproveli aktivnosti u Živinicama, promovisanjem asocijacije na lokalnim medijima, razgovorom sa lokalnim timovima ASuBiH-a i Omladinske banke, te glavnom aktivnosti na Bulevaru, koja se sastojala od flashmoba i promovisanja vijesti koje su zainteresovale javnost. U okviru “ONAuBiH sedmice” rađen je i projekat “Humans of Bosnia and Herzegovina”, gdje su članovi asocijacije razgovarali sa građanima i slušali njihove priče.

REDOVNE AKTIVNOSTI ORC I HCA TUZLA

Tokom jula radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA AVGUST 2018.

- Početak implementacije projekta „CAT 18“. U okviru ovog projekta u naredom periodu naše aktivnosti su: Izrada WEB stranice, fb stranice, 3 onground treninga i jedan online trening.
- Nastavak rada na projektnim aktivnostima (održavanje završne konferencije u okviru projekta “Mladi za bolju budućnost”, podržanog od strane Ambasade SAD u Sarajevu)
- Aktivnosti omladinske grupe ORC-a Tuzla

AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH
Tel./Fax: +387 49 211 032
E-mail: svitac@gmail.net
Web: www.svitac.org
FB: www.facebook.com/omladinska.svitac

Dnevne radionice

Omladinska organizacija Svitac je u julu nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su pravili razne ekološke, edukativne i maštovite stvari, uz pomoć lokalnih i međunarodnih volontera. Neke od kreacija su bile: kartice sa porukama za roditelje, kreiranje porodične kuće, lanac drugarstva na papiru, slovo Z, interesantne kreacije sa slamkama, perlicama i drvenim štapićima, kravate od kartona i papira, ručni bubnjevi, itd. Teme su rađene uz pomoć maštovitih radnih listova sa ciljem usvajanja novog vokabulara. Učesnici su nastavili učenje azbuke, nakon završene abecede, te sabiranje i oduzimanje. Na muzičkim radionicama su vježbali pjesmicu „Učimo da brojimo“.



Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima.

Ponedjeljkom je kreativno izražavanje na kojima su učesnici pravili razne kreacije na temu Ekologija i zaštita životne sredine, koristeći razne materijale. Neke od tih kreacija su: torbe i muzički instrumenti od recikliranih materijala, kreiranje postera sa porukama očuvanja životne sredine, farbanje cegera od pamučnog materijala.

Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad.

Ovaj mjesec su ponavljali vokabular o emocijama i izražavanju osjećaja na engleskom jeziku.



Srijedom su učesnici imali kreativne radionice na kojima su radili masnim bojicama i „scratching“, tehnikom, pjenu za brijanje i sapunom, četvrtkom su se družili uz sportske aktivnosti, kada su učili pravila za ragbi, a petkom su nastavili raditi na radionicama njemačkog jezika temu ekologija i zaštita životne sredine i kartice sa vokabularom. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u julu je bio Adin Midžić uz asistenciju lokalnih, Weltwaerts, ERASMUS+, Love Volunteers i Omprakash međunarodnih volontera. Sve aktivnosti se održavaju u Omladinskom centru Brčko distrikta.

Radionice gitare

Učesnici ove radionice su nastavili uvježbavati nove duete, etide i kompozicije iz prethodnog mjeseca, kao i nekoliko novih pop pjesama po vlastitom izboru („Once in a Lifetime“, „Something in the way“). Dio vremena, na nekim od radionica, bio je posvećen upoznavanju učesnika sa modovima melodijske molske skale i korištenju istih u improvizaciji i komponovanju kraćih tema.

Radionice sambe

Učesnici ove radionice su počeli raditi na novoj ideji („Ambience“). Kompoziciju karakteriše veoma spor tempo i bazirana je na frigijskom modu. Takođe, učesnici su ponavljali sopstvene kompozicije iz prethodnog perioda („Perodactyl 1 i 2, Kiborzi“).

Eco projekat



Omladinska organizacija Svitac je, zajedno sa članovima ASUBiH Lokalnog tima Brčko u maju započela pripreme, aktivnosti i rad na zajedničkom Eco projektu. Tokom juna i jula je nastavljeno planiranje raznih aktivnosti i prezentacija.

U četvrtak, 28.06. je u Omladinskom centru održana kreativna radionica za uzrast 16+ sa materijalima koji se mogu reciklirati, kao što su plastične flaše, konzerve, CD-ovi, plastične kutije, itd. Radionica je veoma uspješno realizovana sa 15 učesnika.

Zaštita životne sredine je veoma važna tema. Ovaj projekat će omogućiti mladima da razviju i realizuju svoje ideje o životnoj sredini i njenoj zaštiti, a

takođe im treba pružiti priliku da se upoznaju sa drugima istih interesovanja, kako bi imali mogućnost aktivno raditi na realizaciji svojih ideja.

Za avgust se planira nastavak svih redovnih radionica Omladinske organizacije Svitac.

Institut za razvoj mladih KULT



Ul. 4. Viteške brigade
34 – 36 BA, 71210 Ilidža,
Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org

400.000 KM za pokretanje biznisa mladih iz osam BH gradova

Nezaposleni mladi iz osam bosanskohercegovačkih gradova i općina dobit će sredstva za pokretanje vlastitog biznisa kroz Preduzetnički fond za mlade, koji će sa 400.000 KM finansirati Institut za razvoj mladih KULT i jedinice lokalne samouprave.

Ugovori između Instituta i jedinica lokalne samouprave koje će biti dio programa Preduzetnički fond za mlade su potpisani, a tokom septembra i oktobra bit će raspisani javni pozivi na koje će za dodjelu sredstava moći aplicirati mladi iz Cazina, Trebinja, Općine Centar Sarajevo, Jajca, Modriče, Novog Travnika, Općine Stari Grad Sarajevo i Teslića.

„Mladi iz BiH ne odlaze jer im je negdje drugo dobro, već zato što im je ovdje loše i Preduzetnički fond za mlade je model koji itekako može doprinijeti kreiranju ambijenta u kojem mladi žele ostati jer im pomaže u pokretanju biznisa, ali i nudi i jednogodišnje mentorstvo i podršku u razvoju biznisa.“ – istakao je Jasmin Bešić, izvršni direktor Instituta za razvoj mladih KULT.



Prema istraživanju Instituta za razvoj mladih KULT „Na putu ka politici prema mladima FBiH: analiza stanja i potreba mladih u Federaciji Bosne i Hercegovine“, svaka druga mlada osoba željela bi pokrenuti vlastiti biznis, ali im je u tome potrebna finansijska, savjetodavna i edukacijska podrška. Direktna finansijska i savjetodavna pomoć koju lokalne zajednice mogu pružiti mladima ključna je za dugoročno rješavanje njihovih najvećih problema, kao što je nezaposlenost.

Kroz Preduzetnički fond finansijski i stručno bit će podržano između 50 i 100 biznisa mladih ljudi.

„Ovo je jedna od mjera koja je naš odgovor na problem nezaposlenosti mladih sa kojim se suočava cijela zemlja. Podršku mladima pružali smo i ranije i radit ćemo to i u budućnosti, a vjerujemo da zainteresovanost mladih za učestvovanje u ovom programu neće izostati.“ – naglasio je načelnik Općine Jajce, Edin Hozan.

Institut za razvoj mladih KULT uz podršku Ambasade Kraljevine Švedske u BiH izdvojit će ukupno 200.000,00 KM za implementaciju projekta u osam lokalnih zajednica, a jednak iznos izdvojit će i jedinice lokalne samouprave.

Mladi na kafi sa kandidatima/kinjama za Predsjedništvo BiH

U cilju da podrži razumijevanje mladih u izbornom procesu za Predsjedništvo Bosne i Hercegovine, Institut za razvoj mladih KULT u julu je organizovao seriju susreta mladih ljudi sa kandidatima/kinjama za Predsjedništvo BiH.

Institut za razvoj mladih KULT već je poznat po organiziranju događaja „Kafa sa...“, a kroz koji osigurava smislene susrete javnih osoba, političara/ki, mladih ljudi i drugih inspirativnih i uspješnih Bosanaca/ki i Hercegovaca/ki sa grupama mladih ljudi kako bi razgovarali o svom iskustvu, idejama ili javnim pitanjima važnim za mlade.



Gost programa „Kafa sa... kandidatima/kinjama za Predsjedništvo BiH“ do sada su bili Boriša Falatar, Amer Jerlagić, Mirsad Hadžikadić i Željko Komšić, a susrete mladih sa kandidatima i kandidatkinjama, Institut će organizirati sve do oktobra ove godine.

U Bosni i Hercegovini živi oko 700.000 mladih, koji su zakonima o mladima definisani kao osobe dobi od 15 do 30 godina. Većina mladih ima pravo glasa, a Institut za razvoj mladih KULT na ovaj način im želi dati priliku da budu birači, a ne glasači. Mišljenja smo da pitanja mladih trebaju i

moraju biti dio programa političkih stranaka u BiH, te da je krajnje vrijeme da najviši nivo vlasti u svoj diskurs stavi mlade kao primarni fokus.

S druge strane, na ovaj način predstavnici/e vlasti koje ti mladi biraju imat će priliku svoje izborne programe kreirati u skladu sa stvarnim potrebama mladih u BiH.

„Kafa sa...predsjedničkim kandidatom/kinjom“ uvijek se organizuje u Sarajevu, a za prisustvo događaju na web stranici Instituta mogu se prijaviti mladi iz cijele BiH do 35 godina starosti, koji žele biti dio konstruktivnog dijaloga o potrebama i izazovima sa kojima se ova populacija suočava.

UmiD 13: Učenje i tokom ljeta

Komunikacija, osnaživanje, ljudska prava, neke su od tema o kojima su polaznici/e obuke „Uči, misli i djeluj!“ Generacija 13 učili tokom ljetne škole koja je od 15. do 21. jula održana u Sarajevu.

Polaznici/e učili su o odnosima s javnošću, komunikaciji s medijima, društvenim mrežama, emocijama, ljudskim pravima i važnosti njihovog poštivanja, a imali su priliku i razgovarati sa inspirativnim osobama iz javnog života Bosne i Hercegovine.



U okviru programa „Kafa sa...“ o imidžu i javnom nastupu razgovarali su sa Mladenom Obrenovićem, novinarom web portala Al Jazeera Balkan koji je kroz dvosatni razgovor sa mladima iz cijele BiH nastojao

podijeliti korisna iskustva stečena tokom dugogodišnje novinarske karijere i susreta sa različitim važnim ličnostima.

Također, polaznici i polaznice obuke imali su priliku prisustvovati i Kafi sa... Mirsadom Hadžikadićem, nezavisnim kandidatom za člana Predsjedništva BiH, koja predstavlja jedan u nizu susreta mladih ljudi sa kandidatima/kinjama za Predsjedništvo BiH, a koje organizuje Institut za razvoj mladih KULT od juna do oktobra 2018. godine.

Obuka UMiD - "Uči, misli i djeluj!" zvanično je priznati vid neformalnog obrazovanja koje mladima pruža mogućnost sticanja različitih kompetencija koje će ih učiniti konkurentnim na tržištu rada, a program se sastoji od seminara, praktičnih vježbi i volonterskog rada. UMiD je namijenjen mladim ljudima do 30 godina.

Otvoreno kino i novi prostor za mlade u Stocu i Bistrici

Institut za razvoj mladih KULT i u mjesecu julu imao je priliku posjetiti mlade ljude koji prave važne promjene u svojoj lokalnoj zajednici.

Kroz realizaciju Lokalnih građanskih inicijativa koje se provode na području cijele Bosne i Hercegovine, a koje podržava i Institut, mladi iz Stoca konačno su uživali u kino projekcijama, a opremljen je i novi prostor za mlade iz Bistrice.



Članovi/ce Udruženja Koraci mladosti iz Stoca pokrenuli su inicijativu pokretanja otvorenog kina u ovom gradu, a projekcije su organizovane tokom sedam dana. Istovremeno je pokrenuta i akcija prikupljanja potpisa za peticiju koja će biti upućena Općinskom vijeću, a koja se odnosi na zahtjev za obnovu kino sale koja je neophodna ovom mjestu. U otvorenom kinu prikazani su poznati filmski naslovi, a projekcije su za sve građane bile besplatne.

Mladi Bistrice, naselja u sklopu općine Gornji Vakuf – Uskoplje, konačno su dobili svoj prostor. Grupa mladih entuzijasta okupljena oko Udruženja građana Bistrica, a uz pomoć svoje mjesne zajednice, uspjela je osigurati i osposobiti prostor za mlade u sklopu osnovne škole koja se nalazi u ovom mjestu, te ovom inicijativom ponuditi mladim ljudima mjesto za okupljanje, druženje, održavanje radionica, predavanja i seminara. Dodatni značaj ovoj inicijativi daje i činjenica da većina mladih u BiH nije zadovoljna mogućnostima koje im se nude, a kada se govori o kvalitetu slobodnog vremena, što je naročito izraženo u manjim i ruralnim sredinama zemlje. Osiguravanjem ovakvog prostora, mladima su osigurani i dodatni sadržaji koji su im neophodni za napredak i razvoj. U novim prostorijama u narednom periodu moći će besplatno koristiti internet, imati prostor za učenje ili besplatno koristiti teretanu.



H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Doboje
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Osim stalnih aktivnosti Merhameta koje podrazumjevaju:

- Evidentiranje članarine, štampanje korisnicima molbi, žalbi, raznih dopisa, fotokopiranja, pregled informacija za sastanke, rada sa članovima, pružanje informacija, raspodjela humanitarne pomoći, izrada projekata i prisustvo seminarima, okruglim stolovima i drugim sesijama, Merhamet Doboje je tokom jula radio i na:

05.07 Direktor Regionalnog odbora Banja Luka, Jasmin Spahić projektom "Donacija krava Merhametima" je predložio za Doboje jednu kravu za povratničku porodicu Mehinović Huseina iz Pridjela. Ovaj veoma humani projekat je od velikog značaja za povratnike, naročito socijalno ugrožene, kao što je porodica Mehinović bez ikakvih primanja (Slika broj 1)



09.07. Nastavlja se implementacija projekta Lokalne akcione grupe, gdje prisustvuje i predstavnik "Merhamet-a" Doboje, na temu "Zdravstvena ustanova bez duhanskog dima" i "Prosvjetna ustanova bez duhanskog dima". Projekat je veoma dobro zamišljen samo da bude uspješno implementiran.



13.07. Održan je seminar predstavnika EU, u Centru za kulturu na temu "Od ideje do cilja", gdje je prezentovano kako napisati projekat i namaknuti sredstva. Aktivisti "Merhamet-a" Doboje su pomno pratili kako bi primjenili uputstva koja su prezentovana na seminaru (Slika 4)



14.07. U Sarajevu je održana prva Skupština "Saveza dobrotvornih društava Merhamet-a BiH". Na Skupštini su prisustvovali predstavnici "Merhamet-a" RS, Brčko distrikta, inostranstva i dr. Skupštinom smo svi oduševljeni, jer se dugo čekalo da "Merhamet-i" budu jedinstveni. Na skupštini je izabran predsjednik i ostali delegati koji su potrebni za rad "Merhamet-a" BiH.



19.07. Imali smo podjelu kurbanskog mesa i "Madi" proizvoda. Donator je bio Regionalni "Merhamet" Maglaj. Ovom podjelom obuhvaćeno je oko 150 porodica.





Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo

Tel/fax: +387 33 205 850

E-mail: asubih@yahoo.com

Web: www.asubih.ba

Mjesec juli obilježen je omladinskim kampovima finansijski podržanim iz Fonda Socijalno dana 2017. Naime, početkom godine objavili smo konkurs za dostavljanje projektnih prijedloga u sklopu Fonda Socijalnog dana, i podržali smo ukupno 25 projekata. U mjesecu julu većina je realizovana.

„ARTivističko ljeto“

U proteklom periodu u Planinarskom domu „Duboka“ Bugojno održano je ARTivističko ljeto 2018 – prvi ovakav kamp u Bugojnu za srednjoškolce, članove Asocijacije srednjoškolaca u BiH (ASuBiH).



„ARTivističko ljeto“ je zasnovano na razvoju kvalitetnih kompetencija i vještina, kao i povezivanju srednjoškolaca iz cijele BiH na trodnevnom kampu. Cilj projekta je povezati što više mladih ljudi i edukovati ih o važnosti kulture i sporta, te informisati širu javnost o značaju mladih ljudi, njihovom aktivizmu i kulturi. Kamp su obilježile brojne radionice i aktivnosti koje su dodatno razvile vještine svih učesnika kampa. Radionicu 1 čini edukacija o aktivizmu, motivaciji i javnom nastupu, dok je Radionica 2 bazirana na kulturu i sastavljena iz više dijelova: glumački, folklorni, fotografski i vokalni dio.

Nakon tih radionica slijede zanimljive „Igre bez granica“ koje jačaju timski i sportski duh. „ARTivističko ljeto“ je također omogućilo svima da se okušaju u streljaštvu i planinarenju na Hajdučka vrata, kako bi doživljaj prirode bio potpun. Dječije pozorište „Eko Art“ također je bilo dio ARTivističkog ljeta sa igranjem predstave „Na rubu“

„Kamp ARTivističko ljeto svim učesnicima je, pored edukacije, učenja i zabave, donio prijateljstvo koje će se zasigurno pamtili. Javnosti je predstavio pravu sliku mladih ljudi koji svojom željom, ambicijom i upornošću kreiraju prostor za sebe – onakav kakav im je zaista potreban.“ – riječi su Milice Savić iz Doboja.

Festival omladinske umjetnosti

Kako oni kažu, počinje se od ideje. Lokalni tim Goražde je tu ideju dobio na seminaru u januaru ove godine.

Ideja je bila organizovati festival gdje bi se okupili mladi iz čitave Bosne i Hercegovine, mladi sa sličnim interesovanjima i podjednako željom da pokažu svoju kreativnost, talenat, te da razviju svoje vještine. I zaista su uspjeli u tome! 20 takvih mladih ljudi, srednjoškolaca, okupilo se na Fočanskoj Jabuci, u blizini Ustikoline. Došli su iz Bosanskog Šamca, Zavidovića, Jablanice, Sarajeva, Bijeljine, Živinica, Gradačca i Maglaja.

„Spojila nas je ista priča – Asocijacija srednjoškolaca u Bosni i Hercegovini (ASuBiH), gdje počinje jedan mladi aktivistički duh svakog pojedinca“, kažu oni.

Zajedno sa 10 domaćina, članova Lokalnog tima Goražde, učesnici „Festivala omladinske umjetnosti“ prisustvovali su radionicama na temu fotografije, glume i muzike. Treneri su bili poznati mladi i

ambiciozni ljudi iz Goražda, koji su se i prije dokazali na polju kulture i umjetnosti, Kenan Tafro (fotografija), Arman Bešlija (gluma), te Ajdin Kitan (muzika).

Pored tema fotografije, glume i muzike, pričalo se i o aktivizmu i volonterizmu, te su se još jednom prisjetili pojma i strukture ASuBiH-a, a u tome je pomogao Riad Čilić iz Jablanice, član Upravnog Odbora ASuBiH-a.

Pri realizaciji festivala, koji je trajao četiri dana (9.7.-12.7.2018.), pomogli su: World Vision, Ministarstvo za obrazovanje, mlade, nauku, kulturu i sport BPK Goražde, O.Š. „Ustikolina“, Grad Goražde i Mješovita zadruga „Staza“. Bez njihove nesebične podrške ne bismo uspjeli doći do cilja.

„Iza nas su četiri nezaboravna dana. Četiri dana koja sa sobom nose ljetne uspomene, nova prijateljstva, nova znanja i vještine. Za samo četiri dana sklopili smo prijateljstva koja vrijede za cijeli život, prijateljstva koja nam pokazuju i dokazuju da u kojem god dijelu Bosne i Hercegovine da se nađemo, uvijek se imamo kome javiti i iznova proživjeti i oživjeti ljetnu uspomenu 2018. Baš zato smo sigurni da je ovo samo jedan veliki početak i da se Lokalni Tim Goražde neće zaustaviti na ovome. Istina je da osjećamo umor, ali i da se nikad slađe nismo umorili. 25 ljudi je živjelo svoje snove i dobilo motivaciju da ih živi do kraja života, zato moram istaći da sam veoma ponosna na Lokalni Tim Goražde, ponosna na Lamiju Hadžić, Medinu Herak, Amnu Kazagić, Ilvanu Hamzić, Faruka Bečića, Jasmina Islamovića, Eldina Ćurovca, Muhameda Tafra i Melisu Geca.“ – izjavila je koordinatorica Lokalnog tima Goražde, Ema Tutić. Nadamo se da je ovaj festival, održan u prirodi, bez savršenog signala i mreže, prvi organizovani događaj ovakvog tipa od postojanja lokalnog tima Goražde, ostao u sjećanju svim njegovim učesnicima, da su naučili nešto novo, da su se zabavili i da su dobili dodatnu inspiraciju da pokrenu nešto ovako i u svojoj lokalnoj zajednici.

„Kroz oči umjetnosti 2“



Od 12. do 15.07.2018. godine u Orašju je održan edukativni kamp pod nazivom „Kroz oči umjetnosti 2“.

Nakon vrlo uspješne realizacije kampa „Kroz oči umjetnosti“ 2017. godine, članovi lokalnog tima Orašje su odlučili nastaviti najljepšu priču njihovog gradića, kako bi pružili priliku novoj ekipi da se iskaže na području umjetnosti.

„Kroz oči umjetnosti 2“ proveden je od strane lokalnog tima Orašje Asocijacije srednjoškolaca u Bosni i Hercegovini, a podržan je budžetom iz Fonda Socijalnog dana 2017. Socijalni dan jedan je od najvećih projekata koje ASuBiH organizuje, te realizuje na način da srednjoškolci na jedan

dan svoje školske klupe zamijene radnim mjestima pri čemu zarade dnevnicu koja se uplaćuje na Fond Socijalnog dana. Osim projekta „Kroz oči umjetnosti 2“, iz Fonda Socijalnog dana 2017. godine podržano je još 25 projekata.

Članovi lokalnog tima Orašje su na četiri dana ugostili učesnike iz Visokog, Fojnice, Tuzle, Srebrenika i Modriče te člana Upravnog odbora Bilala Softića. Posebni gosti koji su se na iznenađenje učesnika pojavili drugi dan kampa bili su profesionalni glumci iz Dis Teatra Banja Luka. Glumci su iskoristili svoje vještine kako bi svoje znanje i iskustvo učesnicima prenijeli na najjednostavniji, a ujedno i najzanimljiviji način, a ako ćemo suditi po utiscima učesnika, to su i uspjeli. Ostale radionice obuhvatile su teme glume, fotografije, motivacije, aktivizma i timskog rada.

Posebno iskustvo pružila je ekološka akcija pod pokroviteljstvom Vijeća mladih. Zajedničkim snagama treneri i učesnici kampa su posadili cvijeće u prostoru oko Omladinskog doma Orašje te su poboljšali i uredili dječje igralište.

Ovim putem zahvaljujemo sponzorima, a to su: Vijeće mladih, Crveni križ Općine Orašje, Grafolade, Radio-postaja Orašje, Bingo, Villa Aroma, ćevabdžinica Sava, ćevabdžinica Baća, pekara Zlatna skela te UO Gurman.

„Informacija je edukacija“

U Brčkom je od 5. Do 7. jula održan projekat "Informacija je edukacija", podržan iz Fonda Socijalnog dana Asocijacije srednjoškolaca u Bosni i Hercegovini, a proveo ga je lokalni tim Brčko.

Fond Socijalnog dana formiran je zahvaljujući najvećem projektu ASuBiH-a - Socijalnom danu, danu kada srednjoškolci mijenjaju svoje školske klupe za radna mjesta, zarađuju dnevnicu koja se uplaćuje na Fond Socijalnog dana. Iz Fonda Socijalnog dana 2017. podržano je 26 projekata među kojima je i projekat Informacija je edukacija. U okviru projekta održane su trodnevne radionice u prostorijama Omladinskog centra Brčko, a učesnici su došli iz lokalnih timova Modriča, Orašje, Bijeljina, Visoko i Brčko kao i član Upravnog odbora Bilal Softić. Radionice su obuhvatale teme: vršnjačko nasilje, psihološke promjene kroz adolescenciju, važnost multikulturalne integracija u Bosni i Hercegovini te su kreirane aktivnosti koje će učesnici sprovesti u svojim zajednicama na osnovu prepoznatih problema (zagađenost životne sredine te nedovoljno prilika i prostora za razvijanje mladih).



Kroz aktivnost "Razgovarajmo" koja je održana prvog dana edukacije učesnici su imali priliku slobodno iznijeti svoje probleme s kojima se susreću i pronaći rješenja za njih, a to je dovelo do međusobnog uvažavanja i upoznavanja učesnika.

Internacionalni događaji

Pored kampova, u mjesecu julu imali smo i 3 internacionalna događaja na kojima su naši članovi zauzeli učešće.

1. Generalna skupština Obessu-a se održala 21. i 22.7. 2018. u Bukureštu. Prisustvovala je članica Upravnog odbora ASuBiH-a, Sara Čurić, zajedno sa još 30 članova OBESSU-a. Na skupštini su se izglasavali amandmani na političku platformu i statut OBESSU-a, ali se takođe birao novi Upravni i nadzorni odbor.
2. Članica Upravnog odbora zajedno sa članicom Alumni grupe AsuBiH-a prisustvovala je Obessu Summer School događaju koji se održava u Slovačkoj.
3. U Bassano del Grapa u Italiji se održava Same Summer Academy kojoj prisustvuju 2 člana, 2 koordinatora i 3 člana Upravnog odbora ASuBiH-a





PRONI Centar za omladinski razvoj

Ul. Mehmedagića 24, 76100 Brčko distrikt BiH
Tel./Fax: +387 49 217 695
E-mail: pronibrco@teol.net
www.pronibrco.ba

Poziv za učešće – Mirovni kamp „Uljepšajmo mir“ Brčko, Brka

O mirovnom kampu za mlade:

PRONI Centar za omladinski razvoj u saradnji sa Crveni krst / križ Brčko distrikta BiH organizuje mirovni kamp „**ULJEPŠAJMO MIR**“, uz podršku Američke ambasade u BiH. Mirovni kamp je otvoren za 70 mladih iz BiH i traje **u periodu od 27.-31.08.2018.** a održaće se u mjestu **Brka (Restoran Holiday) kod Brčkog.**

Kome je namijenjen mirovni kamp za mlade:

Na kamp se mogu prijaviti mladi **u dobi 18 – 25 godina**, koji dolaze iz Bosne i Hercegovine, a koji žele promovisati mir i raditi na projektima koji uključuju angažman mladih.

Informacije o smještaju i troškovima:

Smještaj za učesnike će biti obezbijeđen **u šatorima**, a putni troškovi, kao i troškovi hrane su **obezbijedjeni od strane organizatora**. U sklopu kampa učesnici će imati i **pristup bazenima**.

Kako se prijaviti:

Prijava sadrži detaljne informacije kao i postavljane fotografije “Šta za Vas znači mir?”. Molimo Vas da detaljno pročitate prijavu prije nego što je ispunite, a istu možete pronaći na [ovom linku](#). Prijave su otvorene do 15.08.2018. Za više pitanja i informacija o kampu pišite nam na: info@proni.ba ili nazovite na 049217695.



Posjeta njegove ekselencije Dr. Reinout Vos, ambasadora Kraljevine Nizozemske u BiH PRONI Centru za omladinski razvoj

20. jula smo imali čast i zadovoljstvo ugostiti Njegovu ekselenciju Dr. Reinout Vos, ambasadora Kraljevine Nizozemske u BiH.

Razgovarali smo o radu PRONI Centra u oblasti mladih i o trenutnom projektu koji implementiramo a koji je podržan od Embassy of the Netherlands in Bosnia and Herzegovina, kao i o drugim stvarima koje su od interesa za mlade u Brčko distriktu. Naziv projekta je Mladi protiv nasilnog ekstremizma, (www.nenasilno.ba).



Dan Nezavisnosti SAD-a

PRONI Centar je prisustvovao prijemu u čast Dana nezavisnosti SAD-a koju je Ambasada SAD-a u BiH 27. juna organizovala u Sarajevu.

Iskrene čestitke United States Embassy to Bosnia and Herzegovina povodom Dana nezavisnosti - nacionalnog praznika Sjedinjenih Američkih Država.

INFORMACIJE / DONATORI / POZIVI

Poziv na Školu drugačijih sjećanja u Stocu



Inicijativa mladih za ljudska prava BiH uz podršku forumZFD i ove godine organizuje Školu drugačijih sjećanja u Hercegovini.

Šta je Škola drugačijih sjećanja?

Škola drugačijih sjećanja je ljetni edukativni program baziran na studijskim posjetama čiji je cilj razmjena iskustava lokalne zajednice, aktivista/kinja za ljudska prava, predstavnika/ca vjerskih zajednica, historičara/ki, žrtava i svjedoka/inja o procesu pomirenja i suočavanja sa prošlošću. Škola obuhvata posjete mjestima stradanja i ratnih zločina iz Drugog svjetskog rata i posljednjeg rata u Bosni i Hercegovini od 1991. do 1995. godine, povezujući iskustva zajednica sa šireg područja jedne regije.

Iniciran od strane svojih aktivista i aktivistkinja, YIHR BiH je ovaj program pokrenuo 2014. godine s ciljem povećanja stepena upoznavanja mladih o događajima iz posljednja dva rata na području Hercegovine. Aktivnosti Škole obuhvataju obilaski mjesta stradanja, lokacija masovnih grobnica, koncentracionih logora, vjerskih objekata, mezarja i grobalja, spomenika i memorijala. Od 2016. godine je Škola regionalnog karaktera, te se učesnicima i učesnicama iz BiH pridružuje i manja grupa iz susjednih zemalja – Hrvatske, Srbije i Crne Gore.

Ovogodišnja Škola u Stocu

Škola drugačijih sjećanja uključuje obilaski lokacija ratnih zločina, kao i važnih mjesta koja su važna za istraživanje rata u Bosni i Hercegovini na području regije Hercegovina.

Škola kreće okupljanjem u Sarajevu 24.08., nakon čega učesnici i učesnice odlaze u Stolac koji će biti 'baza' Škole do 29.08. kada se vraćaju u Sarajevu, gdje se aktivnosti završavaju 30. augusta.

U sklopu Škole su planirane posjete Radimlji, Rotimlji, Koštanoj bolnici, Ravnom, Prebilovcima, Širokom Brijegu, Kruševu, Bradini i Grabovici.

Ključni cilj Škole drugačijih sjećanja je pružiti novih generacijama priliku da posmatraju ratove devedesetih iz različitih perspektiva, te saznate kako na različite događaje iz tog vremena gledaju direktni svjedoci, preživjeli i stručnjaci.

Svi zainteresovani trebaju [PRIJAVNI OBRAZAC](#) skinuti, ispuniti i poslati na prijave@yibr.org do 18.08.2018. godine.

Propulsion Fund

U okviru Propulsion Fonda postoji niz programa, koji su razvijeni u saradnji sa kompanijama, i svaki od njih ima svoj jedinstveni identitet, set ciljeva, pravila, uslove prijavljivanja, tematski okvir i nagradni fond.

Propulsion Fond radi s vodećim kompanijama na Zapadnom Balkanu s kojima razvija programe investiranja u inovativne, društvenokorisne projekte briljantnih mladih ljudi. Kao full-service komunikacijska i konsultantska agencija, Fond godišnje usmerava više od 600.000 EUR. Samo u 2017. pokrenuto je 11 investicionih programa s partnerima kao što su SBB, Apatinska pivara, Microsoft, Erste banka Crna Gora, Coca-Cola HBC Kosovo i drugi. Programi Fonda višestruko su nagrađivani u regionu i inostranstvu.

Koje aktivnosti se finansiraju:

Kroz naše programe finansiramo projekte iz oblasti kulture, obrazovanja, novih tehnologija, osnaživanja mladih, osnaživanja ugroženih društvenih grupa, ulažemo u inovativne ideje, i stvaramo nove lidere kroz pružanje finansijske i mentorske podrške, pre svega mladim zainteresovanim ljudima za aktivnosti i teme koje donose benefit široj zajednici.

Veličina donacije:

Ukupni nagradni fondovi u okviru programa koje radimo dolaze i do cifre od 10.000.000 RSD. Potrebno je uzeti u obzir da se sredstva dodeljuju u okviru različitih programa, i da su pomenuti ukupni fondovi obično dele na više učesnika, koji prođu kroz naše programe, koji su ustrojani po jedinstvenoj Propulsion metodologiji.

Rok za prijave:

Programi Propulsion Fonda se dešavaju tokom čitave godine, te je za konkretne rokove potrebno pratiti našu internet prezentaciju.

Geografsko područje podrške:

Naši pozivi se organizuju u više od 200 opština u 4 države Zapadnog Balkana – Srbija, Bosna i Hercegovina, Crna Gora i Kosovo.

Kriterij podobnosti:

Na naše programe mogu aplicirati pojedinci, neformalne organizacije, nevladine organizacije čije su ideje ili projekti idejno u skladu sa propozicijama programa koji je u tom trenutku aktuelan.

Kako aplicirati:

Programi Propulsion Fonda se dešavaju tokom čitave godine, te je za konkretna pravila apliciranja potrebno pratiti našu internet prezentaciju.

Kontakt:

Palmotićeve 25

Beograd

Srbija

Tel: +381 11 405 9619

Koturova 6

Sarajevo

Tel: +387 33 447 227

Email: we@propulsion.fund

Web stranica: <http://propulsion.fund>

Najava drugog javnog poziva IPA prekogranična saradnja BiH – Crna Gora

Objava drugog poziva za podnošenje prijedloga projekata u okviru IPA Programa prekogranične saradnje između Bosne i Hercegovine i Crne Gore 2014-2020 planirana je za početak četvrtog kvartala 2018.

Na osnovu odluke *Zajedničkog nadzornog odbora / Zajedničkog odbora za nadgledanje Programa*, poziv će biti otvoren za projekte u okviru sljedećih tematskih prioriteta:

- **Tematski prioritet 2:** Zaštita životne sredine, promocija prilagođavanja klimatskim promjenama, njihovo ublažavanje, sprečavanje i upravljanje rizicima, i
- **Tematski prioritet 3:** Unapređenje turizma, kulturne i prirodne baštine.

Za više informacija o pozivu posjetite [programsku veb stranicu](#). Detalje o Programu, tematskim prioritetima i ciljnim grupama možete pročitati u [programskom dokumentu](#). Više informacija o dobitnicima grantova u prvom krugu u [nastavku](#).

Donacije i sponzorstva – Holdina d.o.o. Sarajevo

Holdina d.o.o. Sarajevo, kao jedna od najvećih naftnih kompanija u zemlji, prepoznaje važnost ulaganja u zajednicu u kojoj posluje te je veoma aktivno uključena u različite aktivnosti koje doprinose razvitku društva u cjelini.

Sponzorsko-donacijskim aktivnostima Holdina nastoji pružiti pomoć i podršku djeci i mladima, osobama s posebnim potrebama, naučnim, inovativnim i kulturnim projektima, projektima koji doprinose zaštiti i unapređenju zdravlja i okoliša, sportskim amaterima i profesionalcima te projektima važnim za lokalne zajednice u kojima Holdina djeluje.

Politika sponzorstava i donacija

Holdina se pri izboru projekata koje će sponzorirati ili donirati prvenstveno rukovodi kriterijem visokog stepena korisnosti projekata za širu zajednicu i potrebe društva. Sponzorsko-donacijskim aktivnostima Holdina nastoji pružiti pomoć i podršku naučnim, inovativnim i kulturnim projektima koji doprinose zaštiti i unapređenju zdravlja i okoliša, sportskim amaterima i profesionalcima te projektima važnim za lokalne zajednice u kojima Holdina djeluje.

Sponzorisanje mora biti u skladu s poslovnom strategijom kompanije. Pri sklapanju sponzorskih ugovora nastoji se ostvariti ekskluzivitet, generalno sponzorstvo ili sponzorstvo kojim se dobiva mogućnost pojavljivanja kompanije u nazivu događanja, imenu organizacije ili udruženja.

U želji da pomogne onima kojima je pomoć najpotrebnija, program donacija usmjerili smo na dobrobit djece i mladih te osoba s posebnim potrebama. Osnovni kriteriji za dodjelu donacije su posebnost, kvalitet i korisnost projekta za širu društvenu zajednicu.

Holdina neće sponzorirati i/ili donirati:

- Političke stranke i državne organizacije;
- Organizacije koje podupiru rasnu, spolnu, vjersku, manjinsku ili bilo koju drugu diskriminaciju;
- Događanja koja se mogu smatrati uvredljivima za javni moral i dobar ukus;
- Organizacije koje imaju bilo kakvo dugovanje prema Holdini.

Zahtjevi za donacije i sponzorstva

Korporativne komunikacije Holdine zaprimaju zahtjeve za donacije i sponzorstva kontinuirano, tokom cijele godine.

Zahtjev je potrebno poslati najmanje 40 dana prije predviđenog datuma održavanja događaja ili početka projekta za koji se traži donacija ili sponzorstvo i to obavezno na obrascu koji se nalazi na ovoj stranici. Ukoliko ste u mogućnosti, obrascu priložite i navedenu dokumentaciju (nije obavezno).

Svoje zahtjeve na popunjenom obrascu za prijavu šalžite isključivo putem elektronske pošte na adresu: Hi.Donacije@holdina.ba ili Hi.Sponzorstva@holdina.ba. Ukoliko niste u mogućnosti poslati zahtjev putem elektronske pošte, možete ga poslati poštom na adresu:

Holdina d.o.o. Sarajevo

Korporativne komunikacije

Azize Šaćirbegović 4b

71000 Sarajevo, BiH

S naznakom „sponzorstva i donacije“

Zahvaljujemo Vam na povjerenju i interesu za našu kompaniju te Vam želimo mnogo uspjeha u radu.

Donacije

Download obrasca [Zahtjev za donaciju](#) /Word doc/

Dokumentaciju poslati na e-mail Hi.Donacije@holdina.ba

Sponzorstva

Download obrasca [Zahtjev za sponzorstvo](#) /Word doc/

Dokumentaciju poslati na e-mail Hi.Sponzorstva@holdina.ba

Više informacija: <http://holdina.ba/o-kompaniji/donacije-i-sponzorstva/48>

Javni poziv za finansiranje / sufinansiranje projekata za mlade

Na osnovu člana 15. Zakona o principima lokalne samouprave u Federaciji Bosne i Hercegovine («Službene novine Federacije BiH», broj:49/06 i 51/09), člana 14. Zakona o mladima Federacije Bosne i Hercegovine («Službene novine Federacije BiH», broj:36/10), člana 81. Statuta Općine Novi Grad Sarajevo («Službene novine Kantona Sarajevo», broj:30/09-novi prečišćeni tekst i 2/17), Pravilnika za vrednovanje prijedloga projekata nevladinih i neprofitnih organizacija koje djeluju na području Općine Novi Grad Sarajevo broj:02/06-14-9187/17 od 26.05.2017. godine, i Budžeta Općine Novi Grad Sarajevo za 2018. godinu («Službene novine Kantona Sarajevo», broj: 2/18), a na prijedlog Službe za obrazovanje, kulturu, sport, Općinski načelnik objavljuje

JAVNI POZIV

za finansiranje/sufinansiranje projekata za mlade

A/. Pozivaju se omladinska udruženja i neformalne omladinske grupe, kao i druga udruženja i nevladine neprofitne organizacije koja se bave pitanjima mladih da apliciraju projekte za korištenje sredstava iz Budžeta Općine Novi Grad Sarajevo za 2018. godinu – pozicija: Projekti i aktivnosti u okviru implementacije politike prema mladima, nacionalnim manjinama i ravnopravnosti spolova.

B/. Uslovi za korištenje sredstava iz Budžeta Općine Novi Grad Sarajevo za realizaciju projekata za mlade su:

- 1.da je projekat namijenjen mladima sa područja Općine Novi Grad Sarajevo (dokaz: prijedlog projekta);
- 2.da se projekat realizuje do 28.12.2018. godine (dokaz: prijedlog projekta);
- 3.da vrijednost projekta za koji se traži finansiranje ili sufinansiranje nije manji od 500,00 KM i da ne prelazi iznos od 1.200,00 KM (dokaz: prijedlog projekta);
- 4.da aplikanti u tekućoj godini nisu koristili sredstva iz Budžeta Općine Novi Grad Sarajevo za finansiranje aktivnost i iz predloženog projekta (dokaz: izjava ovlaštene osobe organizacije koja aplicira projekat) ,
- 5.da se projekat odnosi na sljedeće oblasti (dokaz: prijedlog projekta):
 - rad sa mladima, jačanje i razvoj sposobnosti mladih, slobodno vrijeme mladih i podrška mladima sa specifičnim potrebama,
 - kreativno izražavanje mladih (pozorišne predstave, koncerti, škole slikanja, fotografisanja, izložbe, i sl.),
 - ekologija (akcije čišćenja i podizanja svijesti i dr.),
 - podrška mladima sa posebnim potrebama,
 - promoviranje volonterizma i timskog rada,
 - podrška mladim talentima.

C/. Dokumentacija: Uz prijedlog projekta sa aneksima aplikanti su dužni dostaviti sljedeću dokumentaciju:

- 1.Rješenje o registraciji za aplikanta i za partnera ako partner postoji (ovjerena kopija – datum ovjere kopije ne može biti stariji od dana objavljivanja ovog Javnog poziva),
- 2.Statut organizacije i partnera ako partner postoji (ovjerena/e kopija – datum ovjere kopije ne može biti stariji od dana objavljivanja ovog Javnog poziva),
- 3.Identifikacijski broj (ovjerena kopija – datum ovjere kopije ne može biti stariji od dana objavljivanja ovog Javnog poziva),
- 4.Uvjerenje o džavljanstvu (original ili ovjerena kopija – datum ovjere kopije ne može biti stariji od dana objavljivanja ovog Javnog poziva),
- 5.Izveštaj o realiziranim aktivnostima aplikanta u 2017. godini,
6. Završni finansijski izvještaj za 2017. godinu (dokaz: ovjerena kopija bilansa stanja i bilansa uspjeha),
- 7.Popunjenu formu administrativni podaci o organizaciji (aneks 5),
- 8.Popunjenu finansijsku identifikacionu formu organizacije (aneks 6),
- 9.Izjavu o podobnosti (aneks 7),

10. Podatke o osobama koje realizuju projekt (kraći CV sa dokazima).

Dokumentacija za prijedlog projekata, aplikacioni obrazac i uputstvo za apliciranje mogu se preuzeti putem zvanične Web stranice Općine: www.novigradsarajevo.ba – padajući meni Aktuelnosti -Javni pozivi ili presnimiti na usb u kancelariji Općine broj 412/IV.

Prijedlozi projekata sa pratećom dokumentacijom podnose se u roku od 30 dana od dana objavljivanja Javnog poziva u sredstvima informisanja, putem protokola Općine Novi Grad Sarajevo i isključivo putem aplikacionog obrasca svakim radnim danom od 8 do 17 sati.

Nepotpune, neblagovremene i aplikacije sa neovjerenim kopijama neće se razmatrati.

D/. Sredstva za finansiranje/sufinansiranje projekata namijenjenih mladima po ovom Javnom pozivu osigurana su u Budžetu Općine Novi Grad Sarajevo za 2018. godinu u iznosu od 12.000,00 KM.

E/. Vrednovanje apliciranih projekata izvršit će posebno imenovana komisija u roku od 30 dana od dana okončanja Javnog poziva, a u skladu sa uslovima iz ovog Javnog poziva i shodno odredbama Pravilnika za vrednovanje prijedloga projekata nevladinih i neprofitnih organizacija koje djeluju na području Općine Novi Grad Sarajevo.

O rezultatima odlučivanja po podnesenim aplikacijama učesnici će biti obaviješteni pisanim putem, nakon čega će biti zaključeni ugovori sa aplikantima čiji su projekti odobreni za finansiranje i sufinansiranje.

Aplikanti čiji projekti budu odobreni za finansiranje/sufinansiranje će prije zaključivanja ugovora, pored dokumentacije koju su dostavili uz prijedlog projekta, obavezno dostaviti i sljedeća dokumenta:

1. Izvod iz registra udruženja čiji datum izdavanja ne može biti stariji od dana objavljivanja ovog Javnog poziva (original ili ovjerena kopija),

2. Uvjerenje poreske uprave o izmirenim poreskim obavezama i obavezama za zaposlene ne stariji od 60 dana od dana okončanja ovog Javnog poziva (original ili ovjerena kopija).

Općina od aplikanta čiji su projekti odobreni za finansiranje/sufinansiranje zadržava pravo tražiti i dodatnu dokumentaciju.

U postupku Javnog poziva Općina ne snosi troškove aplikantima.

Kontakt osoba: Esad Baždar, telefon broj: 033 291 255; E-mail: esad@novigradsarajevo.ba; soba 412/IV.

[DOKUMENTI](#)



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba
hcatuzla@bih.net.ba

Mjesečni bilten uređuje
Omladinski resursni centar -
ORC Tuzla

Prevod Biltena na engleski: **Emir Karamujić**

WEB stranica Mreže:
www.omladina-bih.net

Mejling lista Mreže:
posta@omladina-bih.net

Webmaster:
emir.delalic@gmail.com